

# INUIT ATAQATIGIIT

## Inatsisartuni



UKA 2018/pkt.nr.104  
18. oktober 2018  
Stine Egede

**Kalaallit Nunaanni pinerluttulerinermi Inatsimmi § 20 imm. 2-p allanngortinnissaa pillugu danskit naalakkersuisuinut attaveqaqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut, taamaasilluni unioqquitsinerit imaluunniit inatsimmi § 99 naapertorlugu unioqquitsinerit ilungersunartut immikkut taasat pisortanit unnerluutiginnittussaatitaasunit eqqartuussinermut utaqqisitassamut atatillugu unnerluutiginnissutissangortillugit.**

(Inatsisartunut ilaasortaq Steen Lynge, Demokraatit)

Siullermik oqaatigeqqaassavara inoqammik innarliineq suugaluarluunniit akuersaannginnatsigu.

Tassani pineqartut nikanarsaaneruppata, ajuallatsitsineruppata, qunusaarineruppata, siororasaarineruppata, persuttaaneruppata, timikkut tarnikkulluunniit, assigisaannilluunniit inoqammik oqaatitigut, allakkatigut allatigulluunniit.

Minnerunngitsumillu kinguaasiuutitigut atornerluinerit, meeraappata, arlaatigulluunniit innarluutiliuppata.

Ajoraluartumik ukiuni kingullerni, pingaartumik inuit attaveqatigiittarfisiqut inoqatinik nakkarsaanerit, ajuallatsitsinerillu takussaagaluttuinnarput. Ullutsinni ajornanngeqigami sumiikkaluaraanniluunniit mobiltelefone atorlugu inuit attaveqatigiittarfisiqut inoqat pillugu eqqarsaatigilluagaanngitsunik allannissaq.

Angajoqqaat annertuumik pisussaaffeqarpugut meeqqatta mikinerinik oqaaqqissaarinninnissamik, inoqammik ataqqinninnerup pingaassusianik, taamaalilluta inersimasunngornerminni “peqqinnartumik” inoqatinut saaffiginnissinnaanermik, “peqqinnartumik” oqaloqatiginnissinnaanermik, “peqqinnartumik” tusarnaarsinnaanermik piginnaaneqartunngorlugit meeqqavut inersimasunngortikkumallugit.

Qangaaniit kulturitsinnut ilaalluarsimagaluartoq, immitsinnut susassareqatigiinneq ajoraluartumik ullutsinni qimakkiartuinnarparput. Inuaat peqqissut, toqqisisimasut susassareqatigiissullu pilersissagutsigit, immitsinnut susassareqatigiinnerput nukitorsaqqittariaqarparput.

Immitsinnut ataatsimooqatigiittarnivut imigassartaqanngitsut annertusartariaqarpavut, soorlu timersornikkut, kulturikkullu sammisanik allanik immersorluarluta.

Assersuutissaqqippoq aasaq Amerikap nunavittaaneersut assammik arsarlutik Nuummi unammiuarneranni, kalaallit ataatimoortinnejarmata qanoq nuannertigisoq tamatta misigaarput.

Ajuusaarnartumilli nunatta inuit ikikkaluqaaluta, ilaatigut immitsinnut eriaginngippallaarnerput pissutaalluni aaqqiagiinnginnerit, imminut pissusiluffiginerit pisarput qanigisariit, ilisarisimasariit suleqatigiillunniit iluinni. Ajoraluartumilli ilaatigut ima annertusitigisinnaasarpus aqunneqarsinnaajunnaartarlutik ilaatigullu qulaani taariikkannik, nikanarsaanernik, ajuallatitsinernik assigisaannillu kinguneqartarlutik.

Norskit pinerluttulerinerimi inatsisiminnut ilanggussimavaat, uumissuisumik oqaluttarnernut, oqalugiartarnernulluunnit tunngasunik imalimmik. Tamannalu Naalakkersuisooqatigiit siuliini Naalakkersuisuutarisattalu Sara Olsvig-ip tusagassiutinut nalunaarutiginikuullugu, ersarissumik nassuaatiginikuuaa.

Tassani soorlu internet aqqutigalugu, uumissueqquserpalaartumik siammerterisoqarnissaanut kaammattuinerit, assersuutigalugulu suaassutsimut, oqaatsinut, suminngaanneernermut, upperisarsiornermut, inuunermut isiginneriaatsimut, atoqatigiittarnermut samminninnermut, suaassutsikkut kinaanermut, piginnaasat annikinnerulersimanerannut, ukiunut, naalakkersuinikkut isummersortarnermut inuiaqatigiinnilu inisisimanermut tunngasinnaallutik.

Kinaluunniit kikkut tamarmik isersimaffigisinnaasaanni uumissuisumik oqarfingineqarnani peqataasinnaasariaqarpoq.

Uumissuisumik oqaluttarnerit, imaluunniit uumissuilluni oqalugiarnerit, tassaapput inunnut, soorlu.

Uumissuisumik oqaluttarnerit assigiinngitsorpassuusinnaapput aamma naqissusiisinnaapput, nikanarsaasinnaapput, tatisimannissinnaapput, peqqusiileqititsisinnaapput siorasaarinerusinnaallutillu.

Assersuutigalugu tassaasinnaapput saqqummersitatigut oqaaseqaatit, Facebook imaluunniit oqallitarfiit allat aqqutigalugit, kiisalu tusagassiutini oqaasertalersuinerni (kommentarer) saqqummiunneqartut.

Matumanik kikkut tamarmik oqarsinnaatitaanerat killilersorniarneqanngilaq - kinaluunniit oqarsinnaasariaqarpoq, tassami tamat oqartussaaqataaneranni isummersorsinnaaneq isumaqataanngissinnaanerlu inissaqartariaqarput. Inuit ilaasa uumissuisumik oqarfingineqarnissartik annilaangassutiginagu inuiaqatigiinni peqataanissartik nangaassutigisariaqanngilaat. Taamaattoqarniarpammi tamanna tamat oqartussaaqataanerannut annertuumik annasaqaataassamat.

Pinerluttulerinerimi inatsimmi § 99 maanna atuunnerata nalilersorluarneqarnissa peqataaffigumavarput. Ilaatigut qallunaat nunaanni inatsisip assingusup maanna nalilersuiffingeqaqqinneranut atatillugu suleriaaseq paasilluarusunnarpoq. Tassami nalilersorusunnarpoq immikkoortitsisoqassanersoq unnerluutiginninnerup sakkortussusaa nalilersuutigalugu, tamatumalu kingunerisaanik avitsisoqassanersoq sakkukinnerusorisat

eqqartuussivimmi suliarineqassanersut, sakkortunerusorisallu politiinit ingerlaannaq suliarineqassanersut. Kiisalu innersuussutigissavarput ataatimiitaliami Norskit periuserisaat misissorneqassasoq, tassami ullumikkuut misilittagarilikkatsinnut piulersimasunut sakkussatut tulluarsorinarmat.

Pinerluttulerinermi inatsimmik allanngortitsinissamik siunnersuut, Naalakkersuisunillu ilalerneqartoq, uaguttaaq taperserparput. Kissaatigaarpullu misissortikkusutavut ilanggullugit, ataatimiitaliami susassaqartumi sukumiisumik suliarineqaqqullugu.

Inuit Ataqatigiinniit qilanaarluta suleqataassaagut.

Qujanaq